

Spustar l'introducziun dal PI 21?

Resposta da la regenza a l'incumbensa Toutsch davart il PI 21

■ **(anr/fa) Il deputà Domenic Toutsch e 41 collegas sa fan quitads causa il Plan d'instrucziun 21 (PI 21). Els han incumbensà la regenza da preschentar al cussegl grond era las consequenzas finanzialas dal PI 21.** Ils 21 chantuns tudestgs e plurilings han concludì, sur la Conferenza dals directurs chantunals da l'educaziun publica da la Svizra tudestga (CDEP-T), da sviluppar in plan d'instrucziun cuminaivel, il PI 21. Per il chantun Grischun è vegnì lantschà aposta in project parzial «Grischun» cun l'intent da sviluppar ils plans d'instrucziun da lingua grischuns. Dacurt ha decis la regenza dal chantun Argovia da spustar per trais onns l'introducziun planisada dal PI 21. Per quel spustament fa ella valair motivs finanzials. «Sco ch'i para ha la regenza da l'Argovia gia stimà las consequenzas finanzialas dal plan d'instrucziun dispitaivel ed è vegnida a la conclusiun ch'ìls custs sajan auts», han constatà il deputà al cussegl grond *Domenic Toutsch* (pps, Sur Tasna) e 41 consutsegnadras e -segnaders en lur incumbensa a la regenza, «per quest spustament fa valair la regenza da l'Argovia motivs finanzials, ella tema las consequenzas dal plan d'instrucziun cuminaivel.»

Co sa preschenta la situaziun en Grischun?

Ils 42 deputads han incumbensà la regenza da preschentar ils custs che l'introducziun dal PI 21 chaschunia per il

chantun e per las vischnancas. Medemmain vulessan els ina preschentaiziun dals custs periodics annuals che resultan per chantun e vischnancas causa il PI 21. La regenza duai enpli er examinar in eventual spustament da l'introducziun dal PI 21 fin che las dumondas avertas davart las linguas estras temprivas sajan scleridas.

«L'onn passà hai dà ina consultaziun cumplexsiva tar il PI 21, la versiun consolidada vegn preschentada quest atun a la radunanza plenara da la CDEP-T», ha infurmà la regenza grischuna en sia risposta. Suentar la deliberaziun dal PI 21 vegn il departament d'educaziun chantunal a far in rapport per mauns da la re-

genza. «Avant che prender decisziuns definitivas vegn orientà il cussegl grond.»

Respargn causa damain lecziuns

La stimaziun dals custs per l'introducziun dal PI 21 cumpiglia tant ils custs per il chantun e per las vischnancas sco er ils custs periodics annuals: «Per las instituziuns responsablas per la scola na resultan previsiblamain nagins custs supplementars periodics», orientescha la regenza, «stimaziuns provisoricis davart las adattaziuns da las tavlas da lecziuns grischunas mussan che la dotaziun da lecziuns en Grischun po vegnir adattada cun introducir il PI 21 da maniera che las tavlas da lecziun grischunas correspundan circa a las dotaziuns medias da la Svizra tudestga.» Quai ha per consequenza che las scolas grischunas vegnan ad avair damain lecziuns che enfin uss. Uschia vegn il chantun a pudair spargnar custs grazia al PI 21: «Ina reducziun previsibla da las lecziuns dal stgalim primar per ina lecziun l'emna porta respargns per circa 380 000 francs per tut las instituziuns responsablas per la scola en il chantun. Sin il stgalim secundar resultan respargns da circa 382 000 francs per onn da scola per ina lecziun per emna.» Il termin per introducir il PI 21, l'onn da scola 2017/18, è anc collià cun intginas intschertezzas pervi da differentas dumondas avertas sin plaun naziunal: «La regenza è pronta d'acceptar l'incumbensa e da trair er en consideraziun da spustar eventualmain il termin d'introducziun dal PI 21.»



La regenza grischuna è pronta ad acceptar l'incumbensa dal deputà Domenic Toutsch (pps, Sur Tasna) e 41 collegas.

MAD